

Berri-berriak

2015eko ekintzarik nabarmenenak

ULMA Architectural Solutions. Negozioko erdal hitzuneekin banan-banan elkartu dira, euskara planaren inguruan berba egin eta euren kezka eta iritziak ezagutzeko.

ULMA Conveyor Components. Euskararen erabilera areagotzeko mintzagrama dinamika egin da lantegian zein bulegoan, eta, guztira lankideen erdiak parte hartu du ekimenean.

ULMA Eraikuntza. Eusko Jaurlaritzaren Euslan egitasmoa jarri dute abian. Helburua da 2017rako %20 igotzea euskararen erabilera enpresa barruko lan harremanetan eta hizkuntza paisaian. 2017an berriro aurkeztuko dira Bikain ziurtagirira.



ULMA Handling Systems. Udazkenean Bikain ziurtagiriaren simulazioa egin dugu. Urtea amaitu aurretik gune desberdinetan simulazioaren aurkezpena egin eta aurrera begirakoak zehaztuko ditugu.

ULMA Lazkao Forging. Euskara eskolak martxan jarri dituzte Maizpide euskaltegiarekin batera (6 ikasle) eta terminologia erabiliena euskaratzeko lehen urratsa eman dute.

ULMA Orga Jasotzaileak. Mintzatalde bereziak martxan jarri dira bulegoetan eta tailerrean. Hilean behin, modu informalean kafearen bueltan elkartzen dira.

ULMA Packaging. Organoetan Euskara Kudeatzeko Eskuliburua aurkeztu eta onartu ondoren, horren zabalkundeari ekin diote; bereziki, zuzendari eta arduradunei emango zaizkien trebakuntza saioetan landuko da.

ULMA Piping. Euskara batzorde berria martxan jarri da, kideak aukeratzeko prozesua aldatuz, eta, Hizkuntza Eskakizunen proiektua onartu egin du Kontseilu Errektoreak.

ULMA Taldea. Abian da Curriculum Vitae-ak gordetzeko aplikazio informatikoa euskaraz, eta, hautagaien euskara gaitasunaren azterketa egiten dabilta.

Bertso, sagardo eta txuleta ederrak

Umore ederrean ibili ziren urriaren 23an Aburuza sagardotegira joan ziren ULMA Taldeko 55 lankideak. Sagardoa egiteko prozesua ezagutu zuten lehenengo, ondoren sagardoa dastatu, eta bertso-afaria izan zuten gero, Miren Amuriza eta Mantxi bertsolariekin. Giro bikaina sortu zen sagardotegian, eta, ondo pasatzeaz gain, negozio ezberdinetako langileek elkar ezagutzeko ere balio izan zuen.

Kultura, gastronomia, euskara eta harremanak; oso ondo konbinatzen diren elementuak dira. Konturatu orduko, autobusa hartzeko ordua etorri zitzaie, eta urtero egin beharreko ekintza dela esanez bueltatu ziren etxera.



2015-2016 ikasturtean, ULMAko 30 langilek eman dute izena eta lau talde antolatu dira: horietatik 4 Lazkao Forjingen osatutako taldean ari dira; 8 B1 mailaren inguruan osatutako taldean; 7 A2 mailadun taldean; eta beste 5 C1 taldean. Horiez gain, 4 ikasle euren kabuz ari dira beraien herrietako euskaltegietan. Euskara eskolak KOMAko eta AEK-ko irakasleek ematen dituzte.

Ziur gara aurten ere probetxua aterako diotela eskolei, eta gogotsu aritu daitezzen animatu nahi ditugu. Besteok ere, kasu egin, eta lagun iezaiezue inguruan dituzuen euskara ikasleei beraien trebetasunak garatu ditzaten eta mingainari eragin diezaioten.

Elkarrizketa



Jean Oyhararay ULMA Pipingeko bulegoan aurkitu dugu, Forjako Mantentze Prebentiboko bulegoan. Buzo urdina jantzita duela elkarrizketa sakon bat izan dugu berarekin, sakona bezain interesgarria.

| Oyhararay edo Oihagarai idazten du Jeanek?

Oyhararay. Ipar Euskal Herriko abizena da eta gaur egun galtzen ari den abizena. Iparraldean familia bakarrak du abizen hau, eta, Saint Michel herrian du jatorria. Euskal Herrikanpo Argentinara ere zabaldu zen abizena, eta gaur egungo Olagarai abizenaren oinarria ez ote den zalantzan nago.

| Zein izan da ULMA Pipingera iristeko zure bidea?

Donibane Garazin jaio nintzen, 17 kilometrora dagoen Iholdi herriko baserri batean. 17 urterekin jaiotetxea utzi eta Arrasatera etorri nintzen Lanbide Heziketako ziklo bat egitera, Eskola Politeknikora. Hazpainen egin nituen ordura arteko ikasketak (frantsesez) eta Arrasatera "eskolan ikasitako erderarekin" etorri nintzen. Ikasle garaiko oroitzapen gogorrak ditut batez ere, euskara etxetik jaso nuelako eta frantsesa ere neure nuelako. Baina, gaztelaniaz ez nintzen moldatzen eta oso gogorra izan zen.

Gogoan dut maisu bizkaitar batek eskolak euskaraz ematen zizkigula iparraldeko 2 laguni eta neuri. Eta hori oso gogoan dut.

Arrasaten pisu bat alokatu genuen, eta han egoten ginen bi-hiru hilabete, etxera joan gabe. Eta etxera joateko ordua iristen zenean abentura ederra izaten genuen, zapatu goiz

osoa ematen baikenuen garraio publikoan.

1983. urteko Arrasate erdalduna gogoratzen dut. Alecopen egin nuen lan ikasketak amaitu bitartean, eta ikasketak bukatu eta berehala, han egon nintzen urtebetez lanean.

Baina, etxera bueltatu behar izan nuen soldaduzka egitera eta Bordelera joan nintzen. Gezurra badirudi ere, oroitzapen onak ditut; txofer ikasi eta kuarteleko txoferra izan nintzen, eta Frantziako hainbat hiri eta herri ezagutu nituen lanbide horri esker.

Ondoren, Baionan argiketari moduan lanean hasi nintzen, baina Debagoiena neukan buruan, eta, ULMA frantsesa zekien norbait behar zutela jakin nuenean, bueltatzea erabaki nuen.

Erabaki gogorra izan zen, gurasoek ez baitzuten hasieran erabakia onartu eta ULMA Packagineria etorri eta bertan 18 urte egin nituen lanean: betiere Laguntza Teknikorako Zerbitzuko lanpostuei lotuta. Hastapenetan, negozioa nazioartekotze prozesuan zegoela gogoan dut eta urte asko igaro nituen mantentze lanetan bezeroen etxean, kanpoan, alegia.

Ingalaterran ere egon nintzen ingelesa ikasten, eta orain dela 8 urte ULMA Pipingeng hasi nintzen lanean. Forjako Mantentze Prebentiboko arduraduna naiz gaur egun.

| Berehala ohitu al zinen Oñatiko euskarara?

Ez. Oso gogorra egin zitzaidan hasieran, euskalkia ez nuen ezagutzen eta kosta egin zitzaidan egokitzea. Baina, gaur egun naturaltasun osoz bizi dut egoera, 26 urte pasatxo daramatzat Oñatin. Urte hauetan guztietan oso ondo mantendu dut iparraldeko euskalkia eta hori erabiltzen dut euskaraz ari naizenean.

| Zein da euskararen egoera Pipingeng? Erabiltzen duzu euskara lanean?

Pipingeng euskara asko egiten dugula iruditzen zait. Gure sailera, gainera, Alecopeko ikasle asko etortzen da, eta gehienek (denek ez esatearren) euskaraz hitz egiten dute eta hori oso pozgarria da. Lanean ahal dudun neurrian erabiltzen dut euskara, lankideekin eta hornitzaileekin ere bai.

Hemen badago aukera euskara erabiltzeko eta, nahi izanez gero, euskaraz lan egin dezakegu Pipingeng.

Oñatin ere euskaraz bizitzen saiatzen naiz, baina baditut aitortu ezin daitezkeen ohiturak ere!